

明史紀事本末補遺

明史紀事本末補遺卷四

毛帥東江劉堯塔孔有德附

熹宗天啟元年夏五月遼東巡撫王化貞遣標下練兵游擊毛文龍率軍丁二百餘名赴河東招降叛逆恢復疆土許其便宜行事文龍報稱由三岔河至娘娘宮十餘日方至猪島上岸人民盡空房室焚燬七月初一日又由猪島外洋獲民舟而舟子李景先原鹿島居民也願隨效用即與千總劉初四日至鹿島先令景先至島探之始知有建州安官胡可賓等已據是島搬運牛馬糧食勒取婦女下令剃髮文龍遣守備蘇其民率領官兵進島驅逐逐安撫居民初八日至給店島亦如之初九日至石城島獲島官何國用斬首級三擒獲三十人並得舟一銅炮二鐵炮四其時有遼

左諸生王一爾因遼城被陷父子直往朝鮮投謁國王借兵恢復遼左朝鮮嘉其忠義加宴禮送之歸國亦至石城與文龍會文龍因令一爾至朝鮮彌串堡地方潛令鎮江避難人民暗通鎮江士民庶咸共嚮應次日千總徐景伯使弟徐六潛度通款且云建州所署游擊佟養貞選兵二百餘名抄截黃嘴山人民永歸文龍與一爾議謂鎮江兵止千餘壯勇既出城中必空若以奇兵掩其不備城可襲而得也即令守備蘇其民分兵要截去兵歸路文龍與一爾等自率新舊家丁屯民直至鎮江城外二十里登岸鎮江中軍陳良策約為內應鷄鳴遂薄城下千總張元祉等先登陳良策率弟良漢蘇義等內外夾擊遂克之佟養貞率家丁前迎被擊仆地就縛併獲其子佟豐年文龍率烏合之衆二百人涉海三千里

鎮江既復寬毅一帶城堡相繼降數百里之內望風歸附日扶老携幼至者百餘人文龍以為人心如此正可乘機進取但初下鎮江兵勢寡弱恐人解體雖乞兵朝鮮尚未見赴當速發救兵數萬餉數十萬以成大功王化貞以其事上聞授王紹勳鎮江副總兵毛文龍叅將或駐義州或駐鎮江聯合南衛東山圖進取命兵部移文天津巡撫畢自嚴登萊巡撫閻朗先督兵策應其化貞調度廣甯兵馬相機征剿一面咨經畧熊廷弼嚴勒兵將控扼山海三方協力務收全勝八月建州兵襲金州遼陽距鎮江八百里多崇山峻嶺唯海州密邇為必爭之地而旅順實登津之咽喉南衛之門戶金州又迫近登萊者也時中國方聯絡朝鮮遣專官設重兵故建州襲下之以杜往來之路九月鎮江復陷毛文龍走入

朝鮮初文龍克鎮江屯民踴躍來歸後見兵勢寡弱人心頗搖王  
紹勳駐兵鹿島去鎮江百餘里觀望不敢進文龍求救于王化貞  
化貞未及應建州兵大舉圍鎮江文龍走入朝鮮建州兵入鎮江  
盡屠之時南衛屯民結聚鐵山上建州兵仰攻之不利被傷數千  
人乃增兵持一月糧圍之蓋金二衛皆降唯復州單游擊聚遼人  
數萬盡赴長山島建州兵駕桴渡江攻之島人溺死者甚衆遺兵  
坐視不能救

二年夏五月授叅將毛文龍總兵王一爾金萊通判贊畫文龍軍  
務發糧二十萬石銀十萬兩給文龍仍頒賜勅印旗牌假以便宣  
行事兵部奏議毛文龍寄命朝鮮潛踪海島向議發閩兵三千航  
海應援仍乞令給銀六萬以濟其急誠憐之也已而閩兵不能即

發則請准上兵勒期渡海竊以敵人雖鳴金而西反顧巢穴亦未必無恐有此可用之師不圖接濟無乃灰忠臣義士之心乎奏上乃有是命 秋八月平遼副總兵毛文龍遣部將陳忠等克櫻桃堀渴站等處有斬獲 九月府羊島守備張盤收復金州六月中敵以劉愛塔之故將金復諸州民誅戮殆盡逃難人民甚多守備張盤程鴻鳴等具舟艦至青山嘴渡之盤招撫遼民男婦老幼以四千計竝無尺布掩體於是挑選丁壯列有三十五隊因哨探金州城內建州兵止五六百遂率島兵以及老幼遼民助張聲勢晝伏夜行齊至金州南城門下舉火軍聲振天建州兵驚潰出北門遁去盤進城安撫居民遂復金州 毛文龍上疏曰臣一介庸愚在遼二十餘載以撫臣王化貞委任遂以孤軍擒叛逆于遼民潰

散之餘復鎮城於麗國畏懦之後雖至夙競水陸糧餉援絕而猶  
仗皇上威靈廟堂勝算計復寬譔術聯南衛而去冬十二月內敵  
人渡河之後尚餘十餘萬歸義之民暨陰陽其志之麗人牽制東  
兵使無西犯僅津登之援師一至廣甯之進兵有期臣張勢寬鎮  
倡率南衛用報撫臣知遇之恩即以報皇上寵異之典乃分津登  
之應援議同築室山海之防守患切剝膚設奇正以定分合保危  
關以衛神京復如理亂絲臣雖孤處海隅瞻依闕廷未嘗不嘆息  
悲咽而繼之以涕泣也敢為皇上陳之請於喜峰山海各處多置  
火炮地龍以資城守以折敵志此山海所以待西虜之法也勅登  
萊撫臣嚴禁奸人批札入麗多端擾害則麗國自悅此登萊所以  
聯朝鮮之法也至於三方布置之謀以廣甯為正登津為奇今則

山海宜守登津宜戰若就登津較量則津兵當以應援山海而登  
萊接聯旅順家邇朝鮮但令各島聯絡其中島上居民慮無不效  
命者夫或招或勦或戰或守或進或退或合或散出沒海上神島  
間之奇謀用登鮮之聯合固非特牽制奇著實為恢復要害臣請  
以遼兵二千使都司陳大韶從島入守旅順則登津朝鮮之水路  
通矣請以遼兵二千使都司王學易從島入守金州仍令陳大韶  
應援則彼此牽制有率然之勢矣請以遼兵二千使游擊宋鵬舉  
從島入守復州則斷敵人之左臂矣使劉有伸入守海州使林茂  
春入守蓋州即命劉可伸為之應援使程攸入守岫岩使尤景和  
合各率所部乘除於鮮鎮寬饒間并相機宜入敵寨且分且合以  
疲其力且進且退且戰且守以挫其鋒譬彭越肆楚之法孫子懼



吳之術敵之逸者勞合者分而後臣督率眾營各兵憑山扼險直  
逼遼城山海關更出師蹙之正如山海扼其頸三岔截其腰臣等  
於東南拊其背而躡其尾遼可復也夫招練遼兵既免安家行糧  
又省日月稽遲兼習敵情而我得一人敵即失一人策之得也  
乃過慮者謂遼民藏奸毋使渡海不知遼將或多通私遼民實懷  
報國何奸之有皇上誠聽臣計給臣餉三十餘萬再挑選登津各  
處遼丁二萬又募浙兵精於火器者萬餘給盔甲器械分往各島  
俾圖戰守以襄恢復奇正互用首尾夾攻豈特敵人不敢窺山海  
即河西亦不敢輕渡矣奏入下部議之兵部覆奏以為文龍接濟  
之說急者自急緩者自緩此已腐古彼如充耳致使君令不足以  
敵臣意當局不足以動旁觀奈之何哉假令渝關可丸泥封西人

可鞭華使文龍即不妨棄置于虎狼搏噬之穴若猶未也則何恃而不恐數月以來置前諸處敵未敢以一矢加遺誠恐長驅而文龍之議其後也文龍滅敵則不足牽敵則有餘議者棄文龍如溝中梗敵一意西向捲甲疾趨危關孤壘奚以禦之據文龍疏中謂某島該兵若干統以某將誠不欲海上各區使敵先據長彼覲覲之心絕我牽制之路也夫遼民苦敵之虐逃依麗國者以十餘萬計其心為中國死者亦且數萬誠勅令戶部亟如臣部議運餉十萬往前接濟遼民勇悍者置之行間列於各島以所舉材官分隸之既無招募稽遲之悞又無安家行糧之費較之客兵不習水土不耐風寒不勇戰鬪者費倍省而氣復倍壯也夫其不可丸泥封鞭華使者朝廷且不惜數百萬金錢為補苴之計而明明能乘

敵之隙者任其疾呼不為引手臣竊惑焉

三年春正月督餉巡按江日彩疏曰竊見援遼總兵毛文龍將東  
征將士竊效按臣復命之典八列四六考語特疏舉刺甚至朝鮮  
君臣與夫宰宰執經畧督餉部院司道登萊巡撫海防各道以及  
餉臣無不人列姓名盡在薦揚之中而歸重于推官孟養志武帥  
趙坦深駭聽聞乞降勅飭之 二月詔賜毛文龍尚方劍璽書關  
防加其弟毛文雲龍錦衣衛職銜 四月建州兵攻旅順堡都司  
張盤大創之先是盤守金州偵知建人標掠淫恣於二年十月初  
五夜領兵襲之建州兵奔竄永甯等堡俱下建州憤益眾來攻盤  
以眾寡難敵預領兵出城伏於山間俟其入城棲息已定伏兵圍  
之砲擊刀斫斬獲無數建州兵擲器械而奔盤以兵少糧乏不敢

回復州隨移兵於旅順三山海口偶有風損南船內有漕爛米豆  
千餘石兵民賴以存活至是建州又率萬騎來攻旅順堡我兵奮  
擊建騎不能下遣使招降盤即斬以徇於是圍益急盤設伏南北  
兩山夾攻建州兵大敗而去 九月毛文龍奏滿浦昌城之捷十  
月文龍奏請兵餉命以漕糧十萬給之閏十月毛文龍奏涼雨田  
之捷又奏牛毛大捷斬級二百三十有奇生擒四人獲馬九十四  
匹十二月文龍奏請餉疏曰兵法云知彼知己百戰百勝臣則知  
之矣知鎮江之可克率二百餘人以往知遼民之可鼓招致之而  
無疑知麗地之可居不猜嫌而竟去知年餘之無應援而不為害  
安坐以圖牽制知敵之可以計取屢設疑而獲勝又知明年決可  
以恢復特請足用之餉通者大捷本可堅據險要以老敵師固糧

不繼撤兵而返以知糧之關係甚大也今者之請不辭舌敝臣意無他專欲恢復以報皇上若職掌大臣又或推阻臣惟有將印勒牌劍盡交之南北軍中隻身而去斷不忍袖手窮島坐視山海之愴惶神京之震動令天下萬世笑臣之無長識也

四年夏四月島帥毛文龍擒建州頭目又收其衆於高嶺沙松牌獻俘奏捷建州頭目金重德奉其主之命往平鹿於東歸路口淫掠士女偵事報文龍隨令王德等襲之陣獲金重德詹大等共十六人已而發兵過江將士王輔李繼盛等力戰又擒其部長太奈斬獲首級甲馬器械有差 秋七月毛文龍進呈地圖並陳鎮守糧餉軍需事 島師三捷時毛文龍兵至祀骨寨骨皮岔分水嶺三戰三捷斬級四百五十餘生獲二十餘人所得馬械無數八月

毛文龍獻俘並請餉請加銜諸將士及優恤陣亡官兵 冬十二  
月上以毛文龍孤軍海外屢建奇功頃又不從反間熒惑特從優  
加左都督仍賜蟒衣一襲銀五十兩其將佐加秩有差給糧二十  
萬復諭文龍選士厲兵相機進取以奏成功先是文龍奏稱建州  
致書求款又接李永芳手札以文龍族屬在遼者俱加優待誘龍  
同叛中分土地事聞於朝故屢膺寵錫

五年春正月毛文龍奏乞貸王化貞以不死詔以威福出自朝廷  
不得干與責之 三月建州兵攻旅順守將張盤朱國昌死之已  
而游擊林茂春邀其歸路擒斬有差金州東聯海蓋南近登萊為  
兵爭之地初張盤駐旅順朱國昌駐長行曾有功駐三山島皆毛  
文龍所撥守百里碁布鼎足傳烽而有功不奉鎮撫命擅約張盤

朱國昌修復南關破土興工及二將至有功負約不赴建州兵猝  
至衆寡不敵盤國昌俱力戰死之建州兵遂破旅順有功潛匿不  
救建州兵引還乃命裨將張攀守之 秋七月兵部酌議旅順駐  
防定畫畧曰當大龍之徘徊各島也豈真相度要害唯敵是求夫  
亦騎虎之勢苟安焉以觀時變而流竄相依漸乃成聚將軍于是  
乎有生氣有幸心而登陸以探之乘夜以試之間有新獲張而大  
之廟堂之上亦不得不過情獎許耀威遠方或一道也俄而分曹  
漸廣哨瞭<sup>新</sup>兩因旅順之棄地而喙息焉見金州之沃土而垂涎焉  
艷恢復之高名而先手焉他意他鎮之坐糜而傲睨焉志本大而  
氣亦張則眇視乎同列局已闔而力不副則歸怨于比隣東之于  
登也卒多激詞而登之于東也認為諷語豈待今日而知尾之大

足之高乎以今日論之夫文龍者以為征勦之大兵而冒險以窺  
老寨越遠以襲新城則誣也以為牽制之游兵而練舟師以習水  
熟海道以通關則不為多矣以為招撫招之要地而護難民無使  
為彼盡致降民無使為彼用則更不可少矣此東鎮之平論也若  
夫旅順之撤張盤原屬偉功南關之工作更不待言今宜令張攀  
暫屯近島為楊帥前鋒養威畜力以待大舉或風日可乘不時遊  
兵亦不得輕騎深入致有疎虞其挑濬長城子鹽塢口即定為張  
攀哨地可也 冬十月登撫武之望以張攀守旅順毛文龍使張  
善繼撤其兵民登撫捐米助攀以救飢荒文龍不悅朝鮮又與大  
龍不協兵部上疏曰國家兩大局一在關外一在海外其犄角之  
勢全其所關成敗之數全其兩不相下而成相逼之形又全且以



海上言之牽制敵人者朝鮮也聯絡朝鮮者毛文龍也駕馭文龍者登撫也傳云以忍為國又云師克在和今日詬誶之事起以小不忍成其為大不和撫臣與鎮臣不和鎮臣與屬國之臣又不和使敵得以伺其便而抵之隙此敵之利中國之大不利也乃改之望為南京兵部侍郎

六年夏四月總兵毛文龍奏擒東人二十九名並馬騾器械兵料薛國觀議曰毛文龍者以牽制建州為職者也果能牽制使彼不敢西來即不必屑屑然有所擒斬獻俘功自昭著於天下倘不能牽制使彼無所顧忌而西縱日擒斬而日解捷何益於封疆之大事哉詔從之諭文龍建州大舉入宣遠竟不及知據所駐須彌島去建州寨三十餘里去宣遠亦如之達不相救宜審處奏聞以圖

報効文龍上言臣於去年十月即發塘報言彼正月後必將大舉  
入犯經畧高第得報脩守備臣非不知也正月十五日臣從雲從  
山發兵令易承惠等進攻威甯營林茂春王輔生進襲海州衛敵  
聞掣回臣未嘗不牽制也建兵攻圍被挫兵家所謂強弩之末特  
慮甯遠全師追襲故緩退以示整暇而以解兵歸還為臣罪豈不  
拊心長嘆嘆乎臣駐須彌島三山接壤廣二百餘里中則雲從山  
西弭島在其前真珠島踞其後以陸程計雲從之離鐵山有八十  
里以水程計僅三十里耳雲從與西弭至義州止一百六十里耳  
鐵山亦如之義州與鎮江相對不過三四里鎮江至遼陽三百六  
十里是鐵山須彌之於彼寨在五百里內而謂相隔三千里是廷  
臣欺皇上也臣請為皇上陳之夫兵者論人心次論地勢遼瀋既

潰議者主三方布置今止甯遼東江耳以人心論甯遼遼兵少而西兵多東江則海外孤懸無所退避盡用命之人心以地勢論甯遼至山海一線可通轉輸易足東江則往來接濟春暮凍閉及冬復合便成絕地大非易守然甯遼至遼陽皆寬平大道能守而不能戰東江則憑險可以設疑出奇可以制勝水陸齊通接濟則艱戰守則易有可據之地勢人心與地勢合進勦恢復終是東江事半而功倍此非敢侈言也乃廟堂之上全無定計彼不西去不言牽制得力一騎過河便言職不牽制警息而群情泄泄警動而衆議紛紛及至今日更議移鎮此何見也如餉兩年未增器械兩年未至船隻方在鳩工而部臣猶言不憚悉索以供之將使麗人飾聽乎抑以此嚇建州也竊恐東江移鎮地勢一失人心便搖無論

不能進勦亦不能牽制斷斷乎其不可者上從之閱視編脩姜曰  
廣給事中王夢尹上言文龍以二百人入鎮江據鐵山招潰散之  
民至十餘萬即不謂攻建州之心腹亦可謂收遼左之刁遺不愈  
於遼陽一陷望風而潰者哉如文龍者不可不謂之豪傑若堂堂  
正正與鐵騎決勝於郊原臣等不敢信文龍至于設伏用間乘敝  
出奇文龍自信其能臣等亦信文龍之能也 五月建州兵將西  
行島帥毛文龍身督將士攻會安堡克之接回難民千餘擒獲三  
十六人 八月建州兵東下島鎮將士遇之于大石門嶺七道河  
擊敗之 九月旅順兵變時旅順裨將李鏞素貪淫毛文龍遣官  
提之鏞遂叛去

七年春三月建州兵攻朝鮮朝鮮不支折而入於建州遂導建騎

東萊毛文龍力禦之東江將士高萬重徐敷奏鄭繼武等皆潰文  
龍遣其子叅將毛永祿等襲建州兵於義山廷關口錢山等處上  
命文龍相機戰守並命登撫暫移登青萊三府倉儲接濟勵戎士  
以壯軍聲初建州兵東行克艾州宣州畧鐵山郭山及攻雲從島  
不下又東取安州攻直定二州戰不利遂還師 八月巡撫登萊  
都御史孫國禎報毛文龍宣川之捷頌及厥臣魏忠賢 九月平  
遼總兵毛文龍訴乏餉奏不平五事乞身求代不許

懷宗崇禎九年秋七月起袁崇煥督師遼東時朝議憂皮島毛文  
龍難取大學士錢龍錫被命入都過華亭徵士陳繼儒繼儒定策  
請謀文龍龍錫領之至是龍錫與崇煥言遼事崇煥答以從東江  
做起龍錫曰舍實地而問海道何也崇煥曰可用用之不可用謀

之此崇煥所優為也遂定計去 八月毛文龍慰諭各島值風泊  
登州

二年春三月袁崇煥奏設東江餉司于甯遠令東江自覺華島轉  
餉禁登萊商舶入海毛文龍累奏其不便崇煥不聽又請自往旅  
順議之 五月袁崇煥巡鎮江再宿勞軍東江尋至雙島平遼將  
軍毛文龍時詣登州請餉聞報馳還 毛文龍請餉初文龍報兵  
二十餘萬給事中王夢尹編脩姜曰廣詣島閱視報十六萬及登  
萊道王廷試定額二萬八千人文龍大不平故有是奏 六月督  
師袁崇煥誘殺平遼將軍毛文龍於雙島文龍錢塘人少不羈為  
鄉曲所輕走塞外潦倒行間者十餘年天啟初遇丹陽諸葛雲程  
談邊事知其能薦於遼撫王化貞授標下游擊化貞遣之東襲鎮

江會廣甯陷文龍因駐兵須彌島當遼事破壞之餘從島中收召遼人牽制金復海蓋時時襲建州頗有斬獲積功至左都督亦漸驕恣所上事多浮夸索餉又過多歲百二十萬朝議多疑而厭之熹宗崩上踐祚諸大臣視東江為贅梳餉道屢絕文龍退保皮島初天啟間崇煥撫遼東遣喇嘛僧緇南木座往建州主款會罷歸未就至是再出無以塞五年平遼之命乃復為講款計建州曰果爾其以文龍頭來崇煥信之且恐文龍泄其款計遂身入島誘文龍至犒吏卒給餉十萬文龍進見崇煥慰勞備至約日閱射崇煥坐帳房以待文龍來謝坐語良久崇煥曰明日不能踵別國家海外重寄宜受煥一拜拜已相約減從往游指麾各營兵四面列圍止文龍兵於外以部曲百人從崇煥問東江各官姓名俱對姓毛

崇煥笑曰若等乃都姓毛若等壯士宜為朝廷宣力徒以海外勞苦糧不時給發深可憫惻若等亦受我拜拜已衆俱感泣遂問文龍曰東江餉司自甯遠輸至亦甚便將軍何再折色召買登萊也且移鎮定營制分旅順東西約束覈餉業已申奏將軍執意不回非冒餉欺君而何語畢西向叩頭請皇命褫文龍冠帶數之曰汝有應斬十二大罪夜郎自據專制一方罪一冒功欺君無汗馬之勞罪二牧馬登萊無人臣禮罪三兵馬錢糧不經查核每歲侵剋數十萬罪四私開馬市潛通島夷罪五命姓賜氏不出朝廷走使輿僮濫給劄付罪六劫掠商船身為盜賊罪七部將之女收為姪妾民間之女沒入為奴罪八逃難遼民禁勿渡海令掘參飢死島中草菅民命罪九拜魏忠賢為父迎冕梳像于島中罪十鐵山遼



人逃竄皮島掩敗為功罪十一開鎮八年不復寸土觀望養寇罪  
十二文龍欲抗辨崇煥曰我今五年不復遼願試尚方劍以償爾  
命又諭其部曲曰文龍不宜殺若等即殺我各錯愕不敢對命旗  
牌張國柄以尚方劍斬之分東江兵四萬八千人為四協副總兵  
毛承祿中軍徐敷奏游擊劉興祚副總兵陳繼盛各統之東江諸  
務屬繼盛暫領明日祭文龍而泣遂收符印自旅順還於甯遠因  
奏文龍罪並以便宜自劾上以文龍驕蹇不之罪且嘉諭之未幾

建州兵大舉南下薄都城競傳崇煥召寇磔于市

甯遠守

三年二月兵部尚書梁廷棟議調東江兵于甯錦督師大學士孫  
承宗言東江為牽制之用但據非其地若移於要害足成牽制且  
其兵民十餘萬兵來則民不能獨留以船渡恐不能急應上從之

命副總兵茅元儀周文郁駐龍武中左右協牽制東江 四月東  
江舟師集南海口抵覺華島劉興治以皮島叛興治故將興祚之  
弟也興祚榆林人居開原衛沒於建州甚見親愛壻之名曰愛塔  
及遼陽失興祚謀歸天啟三年守金復令幕客金某通登萊總兵  
沈有容渡海內應中軍王丙告之收訊興祚兄弟不承誅丙屠復  
州人十餘萬興祚等雖免而疑之甚興祚因購毛文龍空札若干  
填同陷人名氏夜投各營以觀人向背迨曉其來自理者無幾嘗  
攜魚皮生女直陰曰毛文龍密約在又故與其妻相詬誶先隔居  
越數夕擇親類已者辭之衣以己衣縱火劉氏兄弟哭曰愛塔自  
焚矣建州人驗之信不知其走皮島也袁崇煥以聞授副總兵已  
而崇煥殺文龍召興祚及弟興基至亡何建州兵入口興祚謁督

師孫承宗於山海關西（南）前道孫元化委兵八百人俾西援或疑之興祚不敢前承宗令鄭一亨石國柱等同興祚合兵四千人守永平建昌道臣不可遂令一亨守豐潤興祚同裨將王維新等襲建州兵於青山營除夕大破之興祚先登詣其舊習故粹莫能辨斬五百九十級獲畜產稱是正月元日興祚至兩灰口建州兵數十騎奄至馬不及甲步鬪殺傷過當突中流矢死弟興賢被執興祚遁亡之餘百計脫歸有宋李顯忠之風驍勇敢戰邊吏忌之不得志青山之戰賈勇陷堅卒死于難興治先留皮島躡西協事武健亞興祚念兄死未卹又怨署島副總兵陳繼盛佯祭興祚諸將來唁因殺繼盛並調兵官王遠督糧經歷劉應鶴等十一人引衆迎兄興祚於長山島大殺掠孫承宗以聞命承宗調戡之時本兵

梁廷棟愆忽無遠畧島帥毛文龍既死視若贅疣議內徙其兵民至是變起倉卒始深以海上為憂上言興治踞皮島叛拘兵船商舶此不南走登萊西叩山海則縱橫海島間據為扶餘是建州之外又生一建州矣今當令總兵張可大回登州嚴兵以待龍武三營駐防覺華島檄副總兵周文郁劉應龍相機招輯如定亂即佩大將印上並從之周文郁入皮島諭興治督餉戶部郎中宋獻駐旅順堡諭各將安輯承宗亦遣諸生吳廷忠諭之興治等稍職五月以錦州叅將黃龍守登萊兼制東江龍至皮島建州兵至擊敗之耿仲裕倚兄仲明為私利陰與建州市龍計誅之前東江副總兵毛承祿揭訴父文龍之寃曰祿父疏報自天啟四年至今上三年正月諄諄懇懇不曰遼陽舊城距潘家董家口五百餘里

早晚可踰朵顏直徧京師則曰要從潘家冷口進攻豐潤臺頭建昌等處不曰賄通西虜混入隊中徑到喜峰口伏兵在後襲其不意則曰要與新墻小歹青從喜峰口等關悉兵抄入甚至有臣在似無益於封疆臣死未必不足為神京慮等語而雖其與之頃者直新來京敵猶盤據遵永間蓋兵入薊邊踰月而無能辦其為遼與插者既襲陷遵永經旬而猶有傳報兩城無恙者則祿父當年何言之鑿鑿如是屈指祿父十年以來無日不與敵爭旦夕之命如用百九十七人襲破鎮江而擒佟養貞等以挫敵鋒用島帥便宜攝署朝鮮國事而為擁立新君以存屬國父宗之在遼而避難右屯者三百二十七口被敵搜斬無遺祿子扼于泮林一日七戰以免於難當全遼獸驚鳥散之辰為收拾沿海島嶼二三千里的

亡五六十萬還之朝廷據皮島鎮江之形勝以南蔽登萊東聯屬國北張鷟鞫而成牽制之局建州數大舉闕闕父輒乘間擣虛令不得長驅乘勝建州破朝鮮兩道父為截其歸路扼王子於麗地瓶山而鮮疆無恙種種奇績未易悉數而為逆黨徐敷奏用關（甯）撫秩厚餉乘海外飢疲誘去驍將李鑛鄭繼武等五人各島精兵二三萬勢為中頓嗣後中朝疑謗所集登萊庚癸頻呼而父猶痛心切齒慷慨自許豈料遽隕命於逆臣之劍鉞哉祿不知當如何為父伸理而唯此逆料假道窺京一案諒為廟堂所扼腕而傷神者揭上朝臣不之省 九月皮島劉興治襲建州兵于青山鳳凰堡屢有斬獲

四年十一月恭將孔有德叛初東江劉興治作亂屠皮島皮島舊

副總兵張燾與興治內戚沈某合謀圖興治未發會登萊巡撫孫元化薦叅將黃龍為都督僉事鎮守東江至島興治遂叛去元化以兵部督援急迫命叅將孔有德等從海上以三千人赴之有德遭颶風幾死迨歸復命從陸有德不勝怨望屯鄒平月餘進至吳橋亦變十二月孔有德破臨邑登撫孫元化議親撫之初元化謂復遼土宜用遼人固遼心宜得遼將故徵用遼將孔有德耿仲明等有德連陷商河新城山東巡撫余大成遣材官往諭不聽遣中軍沈廷諭以兵往肩輿赴陣不事介胄而敗元化猶決意招撫登萊總兵張可大至朱橋驛值元化還登州言撫事已定可毋西行可大叩其實始知叵測仍西去元化竟檄止之有德過青州甲騎不及千人餘皆烏合矢亦盡余大成擁兵三千追擊甚易元

化遺書賊已就撫不可往東一步以壞撫局大成如其戒而止有德攻登州初至泥水山固甚元化令家丁乙登雲持書諭之有德始營山下夜攻城東南砲却之又攻西城不克旁掠諸邑元化與遼將耿仲明定計招撫

五年春正月登萊總兵張可大令副總兵張燾與蜀將邵國祚合兵三千六百人戰城東燾麾下叛應者忽戴紅巾反戕我兵殲焉游擊陳良謨等死之有德上書孫元化元化信耿仲明之言復書許之開門納張燾兵三百人蓋偽降也各官力阻不聽夜漏十刻內應開東門殺官吏紳民幾盡執孫元化及兵備宋光蘭分巡王梅等里紳梁之垣拘於游擊耿仲明家脅元化貽余大成書求奏赦願恢復遼東更造舟募兵居七日適有船航海乃縱元化等



歸張可大知水城不可守殺婢妾自經于太平樓張燾亦懼罪死  
初有德攻城登人告急元化怡然曰已別有計遂陷遼兵欲殺宋  
光蘭因自叙清操而釋殺故河州判官張瑤元化尋航海逃至天  
津伏誅光蘭等俱謫戍孔有德陷黃縣罷東撫余大成以謝璉為  
副都御史巡撫登萊擢山東武德道叅政徐從治巡撫山東從治  
遂入萊州治城守孔有德引兵薄之總兵王濬與楊御蕃不協遠  
屯御蕃戰失利入萊城見攻益急二月叅將彭有謨以南兵三  
百人入萊城共守初萊城乞援於總兵劉國柱國柱山東抵山東  
境頓兵不進兵部贊畫主事張國臣遼人力議撫中朝皆倚之謂  
撫成則萊圍自解巡按王道純言三事曰分移駐新撫臣徐從治  
防臣謝璉不宜並城一當移駐萊陽相犄角曰須精兵孔有德所

時登州婦人王子人等獲由二商離走生即能言云聞將軍助陳滅賊兵面語之兒言如初殺之殺開楊某廟

# 大興傅氏長恩閣鈔本

畏惟降夷川兵宜加調為合勦計曰慎招安彼既叛亡毋論不來即來而收之保無奸人內應乎必過萊入登在彼受降為便也

三月張國臣出撫遼兵巡撫徐從治上言撫使一出則攻城益急乃謂我不當總城出擊以怒之也果爾必使任意攻圍我拱手以萊授之如孫元化之於登城而後成其撫乎叛兵視臣等猶元化也元化已一誤國臣又從而效之盈廷集議自以為一紙賢于十萬援兵絕跡職此故矣臣死當為厲鬼殺賊必不敢以撫之一字面謾至尊敗封疆而戕民命奏入不報蓋登萊撫議實周延儒主之孔有德以舟三十艘招皮島將陳有德有德誘殺二島將以三千人入登州四月總兵鄧玘王洪以川兵萬人自昌邑東援距萊州四十里而止萊城糧乏出兵於外樵採被掠三四百人

德進攻西南隅巡撫徐從治傷于砲死之從治奉詔駐青州以萊  
城危急駐青不足以鎮萊人之心而入萊則可以繫全齊之命遂  
委身孤城示萊人以必死有德盡銳圍之屢旬不拔慮守兵之議  
其後終不敢解圍長驅全齊賴以保障從治既死萊人感其義卒  
堅守不下 七月孔有德誘執萊撫謝璉先是推官屈宜揭以總  
督檄入萊城云叛兵且降欲一見璉璉信之遂主其議遣萊州知  
府朱萬年出南門諭之孔有德等下馬迎拜萬年復入璉與翟劉  
二內監朱萬年同出宣詔被執萬年亟呼閉門有德即殺之推官  
屈宜揭得入尋自經死有德擁二內監至城下索巡撫印不應而  
退萬年備易糧設守具拒敵數月其力為多是日妻生子人幸其  
有後初孫元化既敗南京吏部尚書謝陞言撫不可再誤總督劉

大興傅氏長恩閣鈔本

宇烈卒以此自愚輕遣屈宜揭往諭遂墮其計科道交章劾之命  
逮訊八月孔有德攻高密東路叅將牟文綬擊敗之有德等欲  
航海先移家長山島官兵奪其路有德撤精銳入登州北城將宵  
遁總兵吳襄率家先登復招遠再復黃縣有德解萊州圍遁九月  
孔有德欲奔山海兵敗復入登州城官軍圍之有德復出戰副  
總兵丁思侯中砲死十月登州降兵六百人謀為外應遼將祖大  
弼設計盡殲之官兵進攻登州城裨將程仲文祖邦樓中流矢死  
有德及李九成棄登州率萬人出戰而敗九成中彈死有德逸出  
航于海

六年夏四月孔有德耿仲明自蓋州歸於建州初仲明弟仲裕陰  
通於建州東江總兵黃龍計誅之及登州陷龍家在城中俱死龍

又撫定鹿島長山島旅順島各誅其黨時守旅順計有德等必逸  
逸必道旅順奔建州嚴兵以待及至逆擊大有斬獲擒毛有順毛  
承福等有德仲明皆故帥毛文龍部曲也已有德道建州兵下旅  
順黃龍死之禮部尚書林欲楫上言孔有德據旅順海上隄防倍  
宜加意皮島孤懸恐不能獨守宜令登撫擇水師善火器者俾與  
皮島犄角亦牽制之一助也 九月命總兵沈世奎守皮島檄諭  
朝鮮世奎遣叅將程龍入皮島宣布朝廷德意因至朝鮮面諭國  
王李倬輸餉二千石上嘉其效順特賜金綺褒之 十二月東江  
石城都司尚可喜降於建州時孔有德耿仲明在迫力河治舟可  
喜向有與有德等同隸毛文龍戲下相善因掠長山廣鹿諸島縛  
都司孫真邦李承恩等走降

八年春正月朝鮮貢使攜參貨貿易索值不遂其欲命留其貨於關外自是貢臣不至 十二月建州兵二十五騎自昌城渡江至朝鮮脅其兵三千人

九年九月建州兵攻朝鮮登萊總兵沈冬魁皮島總兵陳洪範進師耀州北岸于二月丁酉召廷臣于平臺時建州兵十五萬騎攻朝鮮皆西虜部落及遼將孔有德耿仲明等為前鋒上恐來春復入邊命邊吏增兵築壘

十年三月建州兵破朝鮮國王李倬走澤村山城於是平壤王京皆下李倬力屈降又走紅華島世子見執時總兵沈冬魁陳洪範並在皮島冬魁有衆萬餘洪範有衆八千戰艦俱不及百命相機進援朝鮮夏四月建州兵自雲從島入皮島副總兵白登庸提督

陳洪範俱西走建州兵五萬駐鐵山遣遣使招皮島總兵沈冬魁  
不應乃引大兵赴之孔有德將騎兵陸攻耿仲明尚可喜將舟師  
水攻鏖戰再晝夜冬魁兵敗副總兵金日觀死之冬魁即焚倉粟  
攜家登舟走石城島陳洪範亦自廣鹿島至先是毛文龍守雲從  
島建州兵屢攻不下文龍既以誅死劉興治復因忿激作亂人心  
益搖至是建州兵以遼將為前驅諳水戰習地利故所向立下而  
陳洪範觀望不協力冬魁孤注盡沒五月島兵沈志祥作亂殺  
監軍道黃孫茂副總兵白登庸走降於建州時建州封孔有德恭  
順王耿仲明懷順王尚可喜忠順王

明史紀事本末補遺卷四終

大興傅氏長恩閣鈔本



大興傅氏長恩閣鈔本

明史紀事本末補遺卷五

錦圖戰守

熹宗天啟二年三月命王在晉以兵部尚書兼副都御史經畧薊遼津萊軍務宿將杜應奎蕭如薰募兵訓練時熊王新敗朝議以東事為憂大學士孫承宗以在晉未足恃乃自請經畧改在晉南京兵部尚書遼東巡按方震孺招還祖大壽時大壽擁衆據覺華島無所屬建州招之不往震孺遣其婿一作妹吳良輔都司張國卿諭以忠義大壽泣遂載妻子率衆來歸共救回兵民十餘萬器甲牛馬無算震孺當廣圖失事之後捍禦河西披甲五月倉廩厚半寸將士無不感泣奉命將歸猶出居海島已而御史郭興治劾震孺黨庇熊廷弼失陷封疆遣緹騎逮治論辟公論寬之魏忠賢

敗得釋

四年八月大學士孫承宗出關督師疏薦副總兵趙率教滿桂  
六年春正月建州兵大舉攻甯遠叅政索崇煥力禦之發炮擊死  
無算斃其帥長孫哈兔斬級六百建州兵從灰山解還甯遠關門  
要害也門以東則滿桂西則左輔門以南則祖大壽北則朱梅而  
崇煥總之當兵未薄城下時崇煥椎牛殺馬引佩刀自割其肉烹  
以饗士故士卒咸感奮是時朝中以永甯勢孤有議棄之而內保  
山海者及建州兵既退乃下勅獎厲將士發帑十萬犒賞焉以崇  
煥為巡撫副都御史滿桂趙率教為總兵左輔等俱優叙尋遣中  
使出鎮建州兵至覺華島焚石屯積聚七十萬經畧高第免閏月  
以王之臣為兵部尚書兼副都御史總督薊遼登津軍務改經畧

大興傅氏長恩閣鈔本

為督師 袁崇煥上言臣以書生從督師輔臣孫承宗後力主恢復不意已奄有甯前跨及錦右始終共關外之事則總兵趙率教滿桂二人今議趙率教則駐前屯領關內三部各一車營馬步共六營後勁屬之仍轄中前一所前屯一衛與關上俱其信地滿桂則駐甯遠領前中後各一車營馬步六營前鋒屬之中右一所甯遠一衛中後一所俱其信地而三路哨探遠出錦右以明一軍之耳目大抵兩鎮更迭而前交相為援今年滿桂在甯遠為前鋒則趙率教為後勁明年趙率教東出錦州為前鋒而滿桂以甯遠為前鋒及西虜隨前鋒轉領後勁逐步而前戰則一城援一城守則一節頂一節其議創于承宗而臣因之已而桂率教不相協命撤桂還京師督師王之臣與崇煥又各具疏求去上命之臣回部甯遠

關門兵馬皆聽崇煥節制 八月建州主殂子 立改元表崇煥奏遣喇嘛僧往吊力言建州有通款之意

七年夏四月增設大帥以杜文煥駐（甯遠）尤世祿駐錦州侯世祿駐前屯左輔駐大凌河滿桂駐關門節制四鎮仍賜劔以重事權五月上命薊遼總督閔鳴泰分總兵孫祖壽移鎮山海滿桂移鎮前屯趙率教左輔及內監紀用領兵守錦州表崇煥移（甯遠）黑雲龍移一片石建州兵十五萬攻錦州平遼總兵趙率教守錦城兵至城下呼官兵語率教遣二人絕城而下至營中王子盛氣勞目曰此我家地方爾等在此脩城何為固遣二騎隨至率教應之曰城可攻不可說也詰旦建州兵分兩路擡拽車梯挨牌馬步更番進攻西北二隅率教率左輔朱梅力禦之砲火矢石交下如雨

自辰至戌積屍滿城下至夜乃退兵五里西南下營次日以騎兵環城而行山海總兵滿桂遣兵援錦州遇建州兵于小籬山大戰表裡夾擊敗之建州兵解而東錦圍遂解吳月建州兵攻甯遠總兵滿桂等大戰敗走之建州兵不得志于錦州因而攻甯遠甯遠恭將彭纘古以紅夷大砲碎其營大帳房一座長子召力兔貝勒中箭死次子浪蕩甯谷貝勒亦沒于陣射死固山四人牛录三十餘人翼日益兵赴甯遠守兵出城逆擊之連戰數十合發火砲矢石擊之積屍布地四王子駐教場黃帳房着黃衣督兵攻城抵暮死者益衆乃撤兵歸終夜東行至五鼓營于小凌河留精騎殿後時十年來盡天下之兵未嘗敢與建州一戰袁崇煥甯遠之捷亦止憑城拒却之至是一戰而勝滿桂之力居多遣諸軍分路進追建州

兵悉還瀋陽 七月遼東巡撫袁崇煥請告回籍加王之臣宮保  
督師遼東駐甯遠賜尚方劍大帥以下聽其節制先是建州遣使  
方金納溫台什渡河見紀用袁崇煥議款崇煥主其議未幾有事  
東江又西攻甯錦王之臣以款為不可輕講慮貽封疆之憂議多  
不合而崇煥素不為魏忠賢所喜遂罷崇煥尚任之臣 九月都  
令色令俾乃蠻黃把都等以數萬衆降建州其下多不願往大半  
西投插漢黃把都部落能乞兎金歹青等五千人來降督師王之  
臣遣總兵杜文煥尤世祿祖大壽分領之詔安置塞外  
懷宗崇禎元年二月建州兵駐河上總兵滿桂遣裨將張守印以  
三百人渡河潛擊之有斬獲已又以二萬騎屯塞外使都令為鄉  
道攻克拱兔男青把都板陞盡有其地青把都遁邊兵出哨截之

引還 罷督師王之臣命袁崇煥以兵部尚書兼副都御史督師  
薊遼登津移駐關門 五月建州兵攻河西高橋朱家窪塔山又  
圍大興堡誘執桑昂兒介順不聽總兵朱梅砲却之越數日致書  
言款邊吏不應乃去 六月建州兵至錦州陷駱駝大興等堡  
七月召廷臣及督師袁崇煥於平臺慰勞備至崇煥銳而輕每易  
言天下事上問東師何日可平崇煥漫應五年為期慷慨請兵械  
轉餉且言吏部用人兵部指揮戶部措餉言路持論俱與邊臣相  
呼應始可成功上然之賜崇煥食至午門兵科給事中許譽鄉問  
以五年果效否崇煥曰上期望甚迫故以此言慰聖心也譽鄉曰  
上英明異日按期責效奈何崇煥以無應識者卜其無成矣  
遠軍乏糧大譟執辱巡撫畢自肅自肅自經死袁崇煥至宥首惡

誘捕其黨新十六人治裨將罪有差乃定 八月建州兵攻黃泥窪索崇煥遣前鋒總兵祖大壽擊却之

二年六月索崇煥誘殺毛文龍崇煥再出督師無以塞五年蕩平之語乃議講款恐文龍泄其謀身入島誘殺之

詳毛帥東江

八月速

不的道建州兵自大鎮堡分二道一自杏山高橋鋪一自松山直薄錦州進克雙臺堡尋自大小凌河毀右屯衛城而去督師索崇煥恐其西請增戍關門遣叅將謝尚政等往備順天巡撫王元雅謂虛驚警遣歸而建州欲以計疲邊吏兵果不出

三年八月殺督師索崇煥先是建州兵大舉薄都城競傳崇煥召敵故及崇煥當遼事敗壞之後經畧高第議棄甯前錦右再守山海賴崇煥力持之甯遠再捷士氣稍振及復鎮薊遼知兵力不敵

月職遼東鎮守內臣初抱忠賢用事各遂俱用內臣  
守至是懷宗踐阼以王之臣疏盡撤之

大興傅氏長恩閣鈔本



大興傅氏長恩閣鈔本

思以揮閫從橫出表餌之計而建州因其勢反用之借崇煥以殺  
文龍殺文龍以賣崇煥因縱兵直抵都城而崇煥不免矣崇煥懷  
慨有權畧熊廷弼而後邊吏皆不及其罪在擅殺致敵而一時難  
民忿禍爰書三尺致寸磔以謝天下蓋刑浮於罪云 十一月都  
督祖大壽出塞襲駱駝山大克獲

四年八月建州兵隲大凌城先是祖大壽被圍於大凌城巡撫丘  
禾嘉總兵宋偉吳襄帥師援之禾嘉恒怯屢易師期又與偉襄不  
相能是日遇建州兵於長山襄營先亂遂敗監軍太僕寺少卿張  
春被執前一日城中食盡何可綱詰大壽令出以慰督輔孫承宗  
自為祭文死之大壽以二十八人詣建州營約下錦州留其子為  
質次日邊兵劫建州營大壽逸出徒步入錦州建州兵隲大凌城

而去年被執時以殉難聞邀贈卹至是上書請款丘永嘉密表其事孫承宗曰春亦丈夫也不能獨不聞其妻翟氏六日不食而自經乎士大夫不能飛矢仆此行尸而忍為他人關說何以見婦人於地下春後卒死於建州祖大壽既入錦州即堅守雖其子在外不之顧也黑雲龍亦負傷逃還復其官十一月督理軍務大學士孫承宗引疾歸

八年五月建州兵五千騎屯九華山總兵祖大壽率兵至吳錦廟逆戰卻之

十二年二月進洪承疇兵部尚書兼副都御史總督薊遼軍務十月承疇出山海關至中前所以千總劉某虛冒誅之劉為總監高起潛私人遂有卻承疇薦劉肇基吳三桂詔以都督吳三桂為

大興傅氏長恩閣鈔本

遼東總兵團練甯遠兵馬以劉肇基署都督僉事

十三年春正月丁卯夜東方黑氣彌空連三夕占大警三月建

州兵至義州謀攻錦州總督洪承疇同甯錦巡撫方一藻以前鋒

總兵祖大壽團練吳三桂分練劉肇基先扼錦州松山禦之調山

海關總兵馬科以萬人往先是錦州建州有事西方收插漢及三

衛部落屢闌入宣大塞故錦甯無警常一攻松杏不克去至是仍

移其兵於東山海以外日事戰爭矣建州造紅夷砲六十招甚

梯者千人買哈喇慎馬萬匹載砲而來欲圖松錦都督祖大壽請

以五萬騎出戰部議馬少不果五月庚寅命總督洪承疇出山海

關戍戍總兵吳三桂劉肇基出杏山副總兵祖澤遠遇建州兵於

松杏間三桂受圍肇基救出之失亡千人所殺傷亦相當副總兵

程繼儒臨陣而怯承疇斬之軍士俱用命是月總兵曹變蛟左光  
先馬科劉肇基吳三桂合擊建州兵於黃土臺敗之總兵祖大壽  
伏精騎五百於朝陽山黃岩寺擊斬九十餘級時建騎五千運餉  
瀋陽早一月建州兵邀錦州餉遼東軍擊卻之於尖山石灰窰尋  
夜襲建州營副總兵劉得勝戰沒時建州兵駐義州不出洪承疇  
軍甯遠以劉肇基短於調度應革任王廷臣代之左光先歸還歸  
白廣恩代之馬科曹變蛟兵入關養銳吳三桂及廷臣廣恩等往  
來松杏間示進取而兵部謂建州兵雖暫退尚在義州邊兵單弱  
或來春建騎復舉宜調宣府大同密雲保定之兵合關門遼左之  
衆以厚其力庶可戰守從之承疇又奏行間兵數多多益善但必  
芻糧足支一年方可會兵各鎮遂命戶部輸餉自天津海運革來

召賈於薊永關遼合八鎮兵出塞東行

十四年春正月洪承疇率總兵吳三桂王廷臣曹變蛟白廣恩等至甯遠承疇馳至松山度我兵將寡不足禦乃調宣府大同總兵王樸楊國柱薊鎮總兵唐通榆林總兵馬科抽練兵共七萬時建州兵自義州大舉來攻祖大壽合諸軍擊之於錦州斬三十六級明日再戰建州兵退尋還兵復困錦州諸軍力竭回甯遠錦州東關副總兵那木氣都司桑永順故降丁遂叛入于建州東關下建州兵益攻錦州掘塹壘牆為久攻計祖大壽力拒四月餘時出巷戰仍復東關洪承疇進至松杏別遣水師奪朝鮮餉道俘其臣李舜男等二百餘人命副總兵王武緯等歸之並遺書孔有德耿仲明尚可喜等以間之不入五月上召兵部尚書陳新甲於中極

殿時祖大奇圍于錦州五閱月聲援斷絕有一卒間出曰城內粟足支半年第乏薪耳並傳大壽語宜以車營偏之毋輕戰總督洪承疇集兵數萬待援未決上憂之問新甲計安出新甲求退與閣臣及侍郎吳姓總督傅宗龍酌議請遣司官面商於承疇有十可憂十可議求皇上報察從之遂命職方郎中張若麒往六月邊兵戰松山石門皆有斬獲陳新甲請出兵塔山趨大勝堡攻敵營之西北出兵杏山抄錦昌攻其北出兵松山渡小凌河攻其東正兵出松山攻其南命下行營議之時承疇雖總八鎮兵僅白廣恩馬科吳三桂敢戰慮分三將於三路則衆寡不敵勢益弱但請且戰且守畧曰久持松杏轉餉錦州守禦頗堅未易撼動若彼再越今秋師老財匱即朝鮮亦窮矣此可守而後可戰之說也今新甲

議戰安敢遽延但恐轉輸為艱鞭長莫及不若稍待使彼自困之  
為得上是之而新甲執前議張若麒躁率喜事狙小勝謂圍可立  
解上密奏請留關外贊理時建州兵苦餉匱騎日三餐步卒一餐  
流言入犯三協以張之陳新甲信其說遺書承疇曰近接三協報  
云彼又欲入塞果爾則內外受困勢莫可支門下出關用師年餘  
費餉數十萬而錦圍未解內地又困何以謝聖明而副中朝文武  
之望乎承疇既激於其言又奉密勅刻期進兵新甲薦前綏德知  
縣馬紹愉為職方主事出關贊畫若麒紹愉俱謂邊兵可戰遂不  
用承疇持久之計七月丙戌上御經筵以錦州事問兵部何近  
日無邊報且曰此一舉也解圍固為勝算但兵未離險朕甚憂之  
庚子洪承疇誓師援錦州職方主事馬紹愉練兵車以待戰壬師

寅師抵松山夜見建州兵屯乳峰山之東傳令諸軍登乳峰山之西乳峰距錦州五六里砦石相應又東西二門竝進兵以分其勢遂立車營環以木城部署畧定建州兵大駭初西部遼人自建州營逸出云聞今秋不得錦州議撤兵歸國朝鮮糧盡不能支也承疇欲稍待之而新甲信若麒紹愉之言再越戰趣戰承疇遂進師八月乙巳諸軍合戰甚力斬百三十級殺固山牛录二十餘人陽和總兵楊國柱陣亡李輔明代統其兵祖大壽分步卒三道突圍圍三重攻穿其二隔于外援而止辛亥建州兵攻乳峰山西營樂卻之再攻不能克壬子諸軍分兩路攻西石門總兵王樸戰敗將士氣沮明日戰稍捷建州兵自是不復出請濟師于瀋陽馬紹愉欲乘銳出奇擊之速解錦州之圍承疇不納我軍越長嶺山過



大興傅氏長恩閣鈔本

塔山迤邐至錦州延松山城之右大同監軍道張斗言宜駐一軍  
於長嶺山防其抄襲我後承疇亦不納且曰我十二年老督師若  
書生何知耶丁巳戰東西石門不利庚申再戰斬十三級辛酉建  
州主自以精騎三千來援午刻據長山嶺山聲言欲圍松山水疇  
按兵不動甲子合戰邊兵拳其大旗進斬九級建州主曰南兵殊  
異他時議旋師故將孔有德等止之建州兵自錦州至南海角度  
地高下挑溝堞土指日間濠深八尺廣丈餘凡濠三重諸軍反因  
于內餉道絕蓋乳峰在錦城而松山又乳峰外也承疇語其下曰  
彼兵新舊迭為攻守我兵既出亦利速戰當各勅屬本部與之力  
鬪余身執桴鼓以從事解圍制勝在此一舉矣而諸將因餉乏議  
回甯遠就食薄暮張若麒與承疇書曰我兵屢勝今日進師非難

但松山之糧僅給三日且今不但錦州圍松山又圍各帥既欲暫回甯遠以圖再戰似可允也於是諸將各懷去志議不一承疇曰往時諸君俱矢報効今正當其會難糧盡被圍宜明告吏卒戰亦死不戰亦死若戰或可冀幸萬一不佞決意孤注明日望諸君悉力方遣諸將書總兵王樸法甚已先遁於是各帥爭馳馬步自相蹂踐弓甲徧野遙望火光謂敵兵在前走還遇伏大潰總兵曹變蛟王廷臣突入松山巡撫錦甯丘民仰誓與承疇同守承疇夜留兵三之一嬰城其二決圍衝陣建州兵邀之尖山石灰窰皆力戰建州兵暫卻俄而雲合不得入城移屯海岸盡沒于潮得脫者僅二百餘人獨白廣恩還松山若麒麟愉附漁舟偕諸監軍逃至甯遠上奏承疇失計冀自免也承疇令白廣恩同都司甯起鰲東走

大興傅氏長恩閣鈔本

小凌河襲建州兵老營走國王碑厯錦昌大勝間自北虜後進小紅羅山請兵解圍是役也督師初不欲戰而陳新甲趨之未免輕進以頓師其既也督師力欲戰而張若麒惑之倏焉退師以就餉形見勢絀而建州以全力制之遂使重臣宿將選卒驍騎十萬之衆覆沒殆盡時周延儒再召故帥杜某就謁曰相公入朝願首以松山為急國家安危繫焉舍此無可措手矣延儒不為意 十一月遼左大雪大餘建兵州兵芻糧俱盡將解圍而歸使降丁入關議款陳新甲信張若麒之言許之

十五年春正月遣職方主事馬紹愉出關議款不成先是竇前副使石鳳臺知建州意欲款馳書通其守將守將答云此吾國素志也鳳臺遽以聞上以私遣辱國下鳳臺於理至是大學士謝陞語

同列曰我力竭矣歎邊以勦寇鳳臺言良是乃屬陳新甲微言于上謂兩城受困兵不足援非用間不可上曰城圍且半年何間之衆可歎則歎卿其便宜行事上又以問閣臣謝陞曰彼果欲歎歎亦可恃新甲遂薦主事馬紹愉可遣從之加紹愉職方郎中賜二品服以行上深秘之外廷不知也丁丑紹愉同叅將李御蘭周維壩至甯遠通於建州建州請勅為信乃復請于朝勅曰聞潘陽有罷兵息民之意朕不難開誠懷遠如祖宗朝舊約建州得之疑邊為邊吏偽作且怒勅中語不應紹愉以聞三月松山城陷總督尚書洪承疇降巡撫丘民仰總兵曹變蛟王廷臣副總兵江蓀饒勲俱被執不屈死總兵祖大壽守錦州年餘力竭城亦陷為標下昇降兩城俱沒建州兵遂克杏山城報至京師大震御史沈向朱

壽圖勅兵部郎中張若麒貪功喪師復逃甯遠請誅之以謝天下  
夏四月加范志完尚書總督薊遼軍務發帑金二十萬給闕寧之  
師命祭松山陣亡吏士建州兵襲塔山下之馬紹愉時駐塔山候  
朝命還約建州毋攻不聽城垂克紹愉出建州猶以卒衛之城中  
兵民俱自焚無降者 五月兵部司務朱濟賈勅同馬紹愉往瀋  
陽講款時建州兵乘勝攻甯遠總督范志完總兵吳三桂再戰建  
州以講款止師緩攻退舍三十里 六月馬紹愉還甯遠以講款  
副書上兵部上問大學士周延儒至再終不對上慨然起時言路  
方攻陳新甲故延儒緘口不敢異同又以脫後罪也上尋亦悔之  
先是紹愉至塔山高臺堡椎牛釀酒張筵席十六燕建州使其使  
一美少年一麗眉皓首之老來會絕不語及開市事問之曰待老

汗命也建州主既至義州責諸臣私通欲殺使者紹愉竄免盖孔有德等沮之九月誅兵部尚書陳新甲職方郎中張若麒下獄論死主事馬紹愉除名

明史紀事本末補遺卷五終

大興傅氏長恩閣鈔本

明史紀事本末補遺卷六

東兵入口

懷宗崇禎二年冬十月建州兵大舉入大安口叅將周鎮死之鎮世祿子也分兵入龍井口游擊王純臣叅將張安德敗走入分入馬蘭谷叅將張萬春迎降山海總兵趙率教以兵入援先是建州兵有事遼西重兵皆聚甯前錦右而山海關以西塞垣頓落軍伍廢弛三衛束不的等多攜貳故建州兵大舉入口巡撫王元推遣兵援馬蘭谷而潰十一月壬午朔京師戒嚴督師袁崇煥自甯遠趨山海關聞警急趨榛子嶺調援丙戌建州兵圍遵化城中火舉奔潰巡撫王元雅自經推官何天球李猷明知縣徐澤教諭曲毓齡中軍徐聯芳彭文炳等俱死之總兵滿桂以五千入援上

召見賜玉帶貂裘封東平侯三屯營副總兵朱來等夜遁總兵朱國彥忿甚揭逃將名氏於市散家財給衆北拜同婦張氏自經死大學士成基命力薦舊輔孫承宗起為兵部尚書兼中樞殿大學士督兵控禦東陲駐通州袁崇煥入援以故總兵朱梅副總兵徐敷奏守山海關叅將楊春守永平游擊滿庫守遼安都司劉振華守建昌叅將鄒宗武守豐潤游擊蔡裕守玉田昌平總兵尤世威還鎮護諸陵宣府總兵侯世祿守三河扼其西下保定總兵曹鳴雷還東總兵祖大壽駐薊州遏敵保定巡撫劉策兵亦至今還守密雲自率大軍居中應援總兵趙率教遇建州兵於遵化敗沒癸巳建州兵破石門驛甲午袁崇煥謀知建州兵越薊城而西率兵躡之丙申崇煥至河西務議超京師副總兵周文郁曰大兵



大興傅氏長恩閣鈔本

宜趨敵不宜入都且敵在通州我屯張灣相距十五里就食河西  
務敵易則戰敵堅則乘此全策也崇煥不聽時命崇煥不得過薊  
門一步蓋先有言崇煥道建州兵入內地而崇煥不知也崇煥甫  
抵左安門建州兵亦抵城下都人競謂崇煥召敵上不能無心動  
建州兵營通州北二十里以二百騎來嘗聞砲聲而退竟日不見  
一騎庚子兵大至宣府總兵侯世祿大同總兵滿桂俱屯兵德勝  
門世祿避敵桂獨戰城上發大砲誤傷桂兵幾盡桂負創卧關將  
軍廟中表崇煥令都司戴承恩擇地廣築門祖大壽陣於南王承  
恩等陣西南崇煥陳陣於西待戰日方午建州騎突東南遶兵力  
戰卻之承恩使陣而南建州兵還而西刀及崇煥相材官表昇格  
之獲免南兵復合遂卻游擊劉應國羅景榮千總竇濟等乘之運

河建騎多冰隔殺數百人守兵亦失亡各相當乙夜收兵上賜酒  
食勞軍壬寅開德勝門甕城屯滿桂餘兵建州兵徙屯南海子甲  
辰召袁崇煥滿桂祖大壽黑雲龍等於平臺崇煥不自安留中使  
於營青衣玄帽而入先張皇敵勢聳朝臣集成款議既見上上慰  
諭久之崇煥憚上英明終不敢言款第力請率兵入城如滿桂例  
不許賜貂裘銀甲滿桂解衣示創上深憫之俱同出崇煥尋遣鄉  
道任守忠以五百人持砲潛攻建州營于南海子戰稍利 十二  
月朔復召崇煥等於平臺上問以前殺毛文龍令追還何也崇煥  
不能答遂下錦衣獄賜桂等饌隨遣內監車天祥慰諭遼東將士  
命滿桂總理援兵節制諸將馬世龍祖大壽分理遼兵是日建州  
兵移營而南克良鄉固安知縣党還醇典史朱德死之 遼東兵

大興傅氏長恩閣鈔本

潰孫承宗撫定之遼兵素感來崇煥滿桂與祖大壽又互相疑貳  
大壽輒率兵歸甯遠遼近大駭初崇煥就遼時大學士成基命晚  
大壽心悸狀因頓首請慎重者再且云敵在城下非他時比上不  
聽至是基命奏以崇煥手札招大壽又條上規畫上從之命督師  
大學士孫承宗急遣官往諭時遼兵約萬五千人自通州南趨張  
灣承宗遣游擊石柱國飛騎追之僅及其尾弓刀相向柱國力諭  
諸將校多有垂涕者但曰主帥已殲又火砲殲我故逃遁至此柱  
國又前追大壽數十里及之大壽母素忠義其妻故妾也亦力勸  
大壽毋負國家大壽乃抵山海關宣聖諭慰諸將校得不叛去江  
西道御史高捷劾大學士錢龍錫發蹤指示殺毛文龍且云據崇  
煥與兵部尚書王洽書曰建州屢欲議款廟堂之上主張已有其

人使文龍能協心一意自當無嫌無戾否則便斬其首榮煥效提  
刀之力伏乞推原主謀者以慰邊士之心時洽已下獄龍錫引疾  
去位 設文武經畧以梁廷棟滿桂為之各賜尚方劍營兩直安  
定二門桂始屯宣武門甕城內謂敵勁援寡未可戰中使趙之璽  
桂不得已揮涕而出以五千人同孫祖壽等戰安定門外並敗沒  
麻登雲黑雲龍被執副總兵申甫以七千人戰柳林大井蘆溝橋  
亦敗沒桂庶而勇守甯遠援錦州敢戰有功既沒都人大懼申甫  
本將備喜術數嘗夜觀乾象語人曰木星入太微垣帝座前患在  
踰旬庶吉士金聲力薦之召見稱旨授都指揮僉書副總兵遂作  
戰車募兵出塞以聲為山東道御史藍甫軍時倉卒召募多市兒  
合戰即敗然甫能仗義死綏時論偉之 巡撫山西都御史耿如

杞人援兵潰於良鄉與秦晉流寇合

詳流寇之亂

建州兵克張灣守

備房可家適克香河知縣任光裕死之攻三河又攻寶坻知縣史應聘堅守不下克玉田知縣楊初芳降

三年春正月辛巳朔建州兵東趨永平夜抵宋莊距城五里甲申克永平時兵抵城下晨登城守將楊春反道之入兵備副使鄭國昌知府張鳳奇推官虞成功盧龍教諭趙允殖東勝衛指揮張國翰死之國昌先令諸生擊楊春斃中書舍人廖汝欽故副總兵焦延慶中軍程應琦守備趙國忠諸生韓原洞等俱力戰沒建州兵入城即召故副總兵楊文魁曰昨歲三月囑汝內應何至今勞我三日力乎鞭之三百廢將孟喬芳戶部員外郎陳此心同知張萬壽諸生宋應元首降里紳布政白養粹行人崔及第郎中賈維翰

卜文煥俱降明日授養粹巡撫永平都御史及第永平兵備副使  
盧龍知縣張養初為永平知府同知魏君謨為灤州知州建州主  
至東岳廟故總兵麻登雲侍側勞孟喬芳等貂裘各一鼓吹而入  
尋東行留王子守之選臣室女白氏崔氏與焉白氏係養粹女有  
殊色特自飾獻者又遣聘還安原兵部侍郎郭鞏女鞏遁拘其妻  
以至鞏尋逃還京師自述有書卻聘兵部尚書梁廷棟劾其書內  
稱大金論死尋減戍廣西戍子建州兵克灤州知州楊濂迫于搜  
兵自殺攻撫南四日不克轉攻昌黎知縣左應選守備石柱備力  
拒之加應選按察僉事建州兵還永平戊戌復東向遣二騎持幟  
致書祖大壽議款孫承宗斬之令游擊劉天祿設覆以待建騎于  
雙望叅將孟道等誘之至李羅嶺伏發敗之左應選與祖大壽追

戰于燕河亦有斬獲自是諸路始敢戰然大抵皆捕漢零騎也

兵部右侍郎劉之綸駐軍遵化娘娘廟山建州兵突至之綸逆擊  
總兵馬世龍擁兵不援之綸中流矢死全軍俱沒初建州騎薄都  
城之綸以庶吉士慷慨請纓言國家養士三百年竟不得尺寸之  
用欲募兵出禦敵獨當一面上壯之擢今職募兵得四萬人出彰  
義門已逸其半御史董羽宸言新兵不任戰之綸氣吞敵不顧至  
是敗死 祖大壽遣叅將張存仁將騎都司劉雄將步守樂亭昌  
黎分布諸將守臺頭營石門燕河各上首功蓋山海關西南撫甯  
昌黎樂亭三縣城西北則石門臺頭燕河三邊城俱灤水要徑也  
甯前道孫元化安輯關外八城關遼無虞 二月克建昌先是關  
內道王楫都督朱梅謀規取建昌而守將孫承業等密來通款孫

承宗令朱梅攜燕河臺頭兵祖大壽以都司陳可立往撫之至是大壽入建昌誅白衍慶等次日建州兵大至繞城而戰連旬獲級八百遂卻之 孫承宗以七百騎援總兵楊肇基於三屯營内外合擊斬二百級 二月建州千騎抵房山有二人呼城下則良鄉千戶萬某及其弟實出檄招降卻之又一騎大呼曰房山是金大定年設縣以護祖陵爾官吏宜出迎知縣楊齊芳力拒之諸生李元勳耿源下城說之曰既近祖陵人民不宜加害騎引去越數日果一二千騎經城北呼諸生陪祭九龍岡蓋金章宗墓也 建州濟師萬餘入永平會邊軍敗於大安口馬世龍不能救建州兵移屯榛子嶺聲言往灤水攻大城通州陰治歸計 四月總兵尤世祿屯梁家橋建州遣遺喇嘛僧言款世祿令守備和應詔千總虎



大興傅氏長恩閣鈔本

大威往報總督張鳳翼特疏糾其惟怯 五月庚辰朔孫承宗誓  
師乙酉大兵向灤州時議恢復先遵化後灤永承宗謂屯豐潤玉  
田以牽遵永當先灤州令叅將黃龍汪子靜携攻具持十日糧赴  
樂亭昌黎游擊傅以昭屯撫南副總兵劉應選鍾宇屯樂亭叅將  
張存仁游擊孫定遠蔡可賢合兵待遣發會總兵尤世祿以款請  
上切責之趙承宗戰承宗同檄總兵馬世龍屯豐潤待合擊總兵  
朱梅以游擊靳國臣取遷安協將王維城潞將馬明英張國振同  
叅將孫承業劉邦誠等候大兵趙灤州合攻以牽遷安之南援中  
軍何可綱叅將申其祐游擊岳惟忠等分屯雙望各山縱永平之  
師義兵游擊劉法守備劉啟職合三萬人屯灤州之蓮泊持白梃  
為聲援兼鄉道承宗駐撫南祖大壽自開平引兵會之己丑抵灤

州馬世龍尤世祿楊肇基吳自勉楊麒王承恩兵科給事中張鵬雲俱至城下總督張鳳翼巡撫許如蘭監軍御史吳阿衡率總兵宋偉等攻遵化掣其東顧辛卯諸軍分攻梯而上建州兵出戰東門大壽預伏弩以待連戰皆捷建州兵還永平遂克灤州壬辰克遼安癸巳克永平時建州兵無固守之志安城去何可綱等人其城諸將繼至孫承宗集將校議曰彼走西北遵化城必虛大兵躡擊彼橐重而遲易及也祖大壽馬世龍分道率輕騎追之有新獲甲午復遵化總兵宋偉同關外副總兵謝尚政川湖副總兵鄧玘先登建州兵開北門去是役也克灤州永平遵化遼安大城邑四各堡十二轉戰三百里斬獲甚衆獲其所署都御史馬思恭兵備賈維翰知府張養初知州楊燿都督李際春及內應朱運泰柴通

大興傅氏長恩閣鈔本

卜文煥等白養粹在及第先為建州兵殺之冷口外養粹妻妾自  
經承宗入永平撫慰士民仍回山海關 八月殺袁崇煥大學士  
錢龍錫以密謀通款下獄論死尋得釋

七年秋七月建州兵入大同張家口又入膳房堡焚龍門關破懷  
來保安殺知州閻生斗命甯達總兵吳襄山海關總兵尤世威以  
兵二萬分道援之時遼東積安頗有言巡撫方一藻總兵祖大壽  
私通和好移其警于西者建州兵圍宣府守兵發砲擊卻之天壽  
山守備王希忠以聞命亟收人畜入保建州兵四畧永甯還兵遇  
之敗績 命保定巡撫丁魁楚移駐紫荆關山西巡撫戴君恩移  
駐雁門關總兵陳洪範移駐居庸關 建州兵下鎮羗得勝二堡  
又攻大同左衛於是朔州渾源皆被圍 建州兵攻威平堡大同

復衛百戶樊朶朶私以牛酒犒之遂解圍南掠平虜 八月建州  
兵克代州分道出攻東路至繁峙中路至八角西路至三岔建州  
兵攻大同五日退攻西安堡左營游擊蔡繼雄拒卻之尋下靈丘  
入崞代崞縣知縣黎壯國降攻忻州知州王凝力守不下攻保定  
竹帛口千總張脩身敗沒 閏八月建州兵攻宣府萬全左衛守  
備常如松砭卻之益兵來攻遂下 建州兵自拒牆堡出塞建騎  
蹂躪宣大踰五回殺掠無算總兵吳襄尤世威分道援大同襄兵  
敗世威部將祖寬以七百騎戰大同北門斬三十餘級宣府總兵  
張金昌戰渾源州把總常承恩戰羊房堡稍利上御文華殿日講  
畢召輔臣諭撤各邊援兵王應熊曰彼利子女玉帛耳田禾未獲  
援兵屯城西刈禾牧馬民甚苦之錢士升亦以為言應熊又曰山

西崞縣敵止二千騎掠子女千餘人過代州望城上戚屬相向悲  
啼城上不發一矢任其颺去上為頓足太息命兵部核邊吏罪  
八年五月建州兵入河套收插漢全部還趨朔州畧平遠鐵山堡  
趨陽和叅將丁奎光遇之把總趙科敗沒趨神池距代州十里踰  
忻州不攻而去尋分兵攻定襄畧五臺 七月出宣府境

九年六月建州兵入喜峰口巡關御史王肇坤死之進至居庸昌  
平北路大同總兵王樸馳援戰稍利 七月建州兵深入畧西山  
自天壽山後間道至昌平降夷二千人內應城陷總兵巢丕昌降  
戶部主事王桂趙悅判官王禹佐胡惟弘提督內監王希忠等皆  
被殺焚天壽山德陵初降夷亦巡關內臣納之卒為累建州兵攻  
鞏華城守將姜瑄砲卻之時謀南下陽遣總兵黑雲龍書似有密

約者蓋雲龍勇敢先被陷逃歸故欲計去之上知其偽召雲龍面  
諭令設伏西山之北誘誘之有斬獲建州兵乃趨良鄉昌平叛  
兵薄西直門建州兵屯清河沙河河南出克寶坻殺知縣趙國鼎  
兵部尚書張鳳翼自請總督各鎮援兵出師許之賜尚方劍給萬  
金賞功牌五百督祖大壽等南援霸州建州兵克定興殺前光  
祿寺少卿鹿繼善又克房山八月唐王聿鍵率護軍千人勤王  
初聿鍵奏請入衛不許克率兵至河南守道周以典止之不聽至  
裕州御史楊繩武以聞命沮還國前鋒值寇掠內監二人乃返尋  
廢為庶人禁置鳳陽總兵王樸擊建州兵于涿州稍利建州兵  
克大安永清分兵攻滹縣遂安雄縣尋自雄縣趨鄭州口總兵參  
澤清攻邵之攻香河還涿州克順義知縣上官蓋自經宿昌平明

日遇邊兵於蘆溝橋趨東北至懷柔大安克西和尋復掠雄縣而  
北徧蹂畿內攻畧城堡督師張鳳翼總督梁廷棟俱踵之不敢擊  
鳳翼屯遷安之五重安從鄧林奇計固壘自守建州兵出建昌冷  
口畧載子女俱斃樞乘騎奏樂凱歸永平監軍劉景耀忿之欲獨  
出戰士民挽之不聽率兵戰遷安之棗村河夜襲殺一二百人鳳  
翼在五重安經旬不出凡四日建州兵始盡次日督師兵部尚書  
張鳳翼卒於行營或曰懼罪飲藥也梁廷棟尋亦卒

十一年三月建州兵至宣府羊房堡晉江諸生蔡鼎上言臣嘗西  
遊宣雲見宣府之右衛膳房柴溝平野低垣綿曠數百里雲中之  
鎮邊守口亦然是宣雲之有可慮也雲中頗飢士馬艱食較宣尤  
甚豈可不早計耶所入果在宣雲則所中必及真保彼意以向所

未及則所掠必厚龍門紫荆綢繆正在此時通政司格之不得達  
揔漢部目赤食以六千騎窺張家口被執遣同降人周元忠至請揔漢舊  
趙白澤宣府偵卒出張家口被執遣同降人周元忠至請揔漢舊  
賞巡撫及閱視內監以開楊嗣昌請互市不許 四月乙巳御經  
筵畢召六部諸臣楊嗣昌述孟子善戰者服上刑語蓋欲款建州  
借之窺上旨也上曰此孟氏為列國兵爭耳今一屬國縱不能伸  
九伐之威何至出漢人下策此後弗復爾爾嗣昌引罪已而嗣昌  
復借天變言款事詳崇禎治亂巡撫甯錦方一藻亦言宜款總督宣大  
盧象昇言講市不講賞許揔漢不許建州侍讀學士黃道周亦極  
言無論建州必不可款款必不可成成必不可久即款矣成矣久  
矣以視甯錦遵薊宣大之師何處可撤而遽謂款成之後可撤兵



大興傳代長恩閣鈔本

中原以討流寇此亦不思之甚矣時傳嗣昌一藩及內監高起潛  
密發黃金八萬銀十萬賂建州講款刑部主事張若麒乞錄當日  
召對語以示中外 九月建州兵大舉分入西協牆子嶺中協青  
山口牆子嶺峻隘蟻附而上三日夜始入內地俱困乏甚竟無一  
襲擊者總兵吳國俊守牆子路戰敗走密雲總督薊遼吳阿衡敗  
沒于密雲初監視內監鄧希詔誕日阿衡及國俊等俱趨賀開警  
倉卒而返調御失措故及於難建州兵既入牆子路待青山之衆  
越遷安薄豐潤遼東副總兵丁志祥竇濟等來援力不能禦建州  
兵南下 十月京師戒嚴徵遼東前鋒總兵祖大壽入援留甯撫撫  
方一藻關撫朱國棟薊撫陳祖芑分守命總督宣大盧象昇率總  
兵楊國柱虎大威進易州出其左移青登萊天津之兵出其右檄

總兵劉澤清以山東兵過其前高起潛為應援癸卯召廷臣及總督盧象昇於平臺上問象昇方畧對曰陛下命臣督師臣知有戰而已上色動久之不懌曰朝廷原未云撫撫乃外議耳象昇曰敵之所忌事事宜防偏陵寢以震人心可慮也趙神京以撼根本可慮也分出畿南剽掠旁郡扼我糧道可慮也厚集兵備之則寡發而多失分兵四應又散出而無功兵少則不備食少則生亂此禦之難也上是之命出與兵部尚書楊嗣昌同議象昇主戰嗣昌稍阻齟齬不能語徒戒勿浪戰象昇還昌平以三萬家扼其衝然建州鋒甚銳不可遏象昇令諸帥選勦卒于十月望夜分四路襲敵營約刃必見血人必帶傷馬必喘汗達者斬總監高起潛遺書泥之家拜刻期誓師於鞏華城慷慨涕下如雨楊嗣昌不能平思有

大興傅氏長恩閣鈔本

以沮之奉 upper 命使赴通州就總監高起潛象昇嘆曰嗣昌不過使  
起潛撓我師期耳憲甚會嗣昌赴軍中象昇曰公等堅意撫款獨  
不聞城下之盟春秋恥之乎象昇邀尚方劍倘唯唯從議秉崇煥  
之禍立至公甫不念衰衣引綿之身復不能移孝作忠奮身報國  
將忠孝兩失何面目立人世嗣昌大沮良久乃曰嗣昌從未言撫  
象昇曰周元忠赴彼講款數數往來其事始薊鎮督監受成於公  
通國共聞誰可諱也周元忠蓋贅人賣卜者善建人故陰遣之建  
州以事重大令贅人來直玩我耳欲兵之元忠乞哀而止時上憂  
甚嗣昌密奏曰臣唯東騎不南耳果盡南不過捐數十城我援師  
虜集可使隻輪不返雲南道御史郭景昌因召對言楊嗣昌調度  
失宜高起潛備禦失策狀上不答景昌退復疏劾嗣昌曰自嗣昌

事小樂天之說起而邊備日弛將士觀望禍遂燎原不可撲滅嗣昌言敵未必入犯今已至矣又言敵無火器今且以砲入矣邊城失守嗣昌魂魄墮地手足無措徒言不得浪戰貽禍封疆唯乞皇上立誅嗣昌以正其誤國之罪不報盧象昇襲建州營不克高起潛部將劉伯祿兵敗於蘆溝橋命諸大臣分守都城各門吏部尚書商周祚請召孫傳庭出潼關移山東巡撫顏繼祖守德州從之于是檄廷（甯）甘肅勦寇之兵北援孫傳庭遣降將白廣恩等領萬人總督洪承疇率總兵左光先賀人龍等合兵十五萬俱出潼關十一月建州兵畧良鄉高陽涿州向河間自入塞分四道一趨滄霸一趨山東濟南一趨臨清一趨彰德衛輝丙寅召文武大臣並工科左給事中范淑泰淑泰曰今敵已臨城尚無定議不知

戰乎歟乎上問誰歟曰外間皆有此議上深憂餉詎寺丞戈元禮言借貸淑泰曰戎事在于行法法不行而憂餉即雨金雨粟何濟大學士劉宇亮自請視師上壯之旋又自改察閱上頗不懌編脩楊廷麟上言陛下有撓代之志大臣無禦侮之才高起潛方一藻曰當歟楊嗣昌亦曰當歟吳阿衡曰歟可恃嗣昌亦曰歟可恃敵人聞之有侮咸有侮心一旦東西合謀邊城失守歟之誤國遂至此極唯陛下赫然一怒明正言歟之罪諭督臣集諸路援師不從中制及今一創彼必東還今事鮮任人而倚一嗣昌南仲在內李綱無功潛善秉成宗澤隕恨國有若人豈社稷之福疏入改兵部主事赴廬象昇行營贊畫象昇語廷麟曰敵鋒銳甚而我兵寡食乏不戰將益輕我公為我往真定與撫按乞糧我且悉兵誓一死

報國吳建州兵薄景州內監劉元斌走德州陷高陽少師大學士  
承孫承宗死之建州兵攻高陽三日且退凌晨譟城下守者亦譟  
建人曰此城泣易破也留攻克之承宗不屈自經子尚寶司丞銓  
貢士鈐等俱死知縣雷之渤遁免承宗博學諳兵事其視師關時  
〔補〕時整頓兵伍按行險隘用遼人撫西部甚有功為邊人所倚重  
既殉難雷之渤宣言其斬餉致變薛國觀惑其說踰年始得卹建  
州兵連克衡水武邑柔強難澤文安霸州阜城尋圍威縣下之殺  
故翰林王建極至內丘知縣高翔漢力守踰旬始退 十二月命  
大學士劉宇亮督察各鎮援兵奪盧象昇尚書仍同高起潛戴罪  
夾勦初上欲以孫傳庭代象昇大學士薛國觀楊嗣昌面奏臨敵  
易帥恐緩師期不若留象昇責其後效時建州兵連下平鄉南河

沙河元氏贊皇臨城高邑獻縣象昇兵不滿萬而建騎分道一自易州趨真定一自新城趨河間一自涿州趨定興勢張甚象昇戰慶都斬百餘級總兵楊國柱虎大威又戰殺傷相當象昇謀合兵伺隙夾擊之會有旨切責象昇遂分兵援真定身至保定決戰抵藁城遣楊廷麟回真定手書求高起潛相援起潛不報象昇將兵五千乏食哀呼莫之應晨出帳北向拜曰吾與爾輩竝受國恩患不得死勿患不得生衆皆泣於是拔寨兼程至賈庄擊建州兵射一騎殪建州兵合圍象昇麾下將士疾馳衝卻之象昇曰今雖勝彼必厚集以乘我慎勿怠明日建州兵來突營象昇曰誰為我取彼者虎大威馳擊之不勝卻象昇大呼曰虎將軍今吾致命之秋也乃招後騎皆進奮刀督戰身中二矢二刀猶疾呼不已馬蹶

遇害年三十九虎大威楊國柱皆潰圍出起潛聞敗欲西遁皇遽  
仍東行二十里值伏大潰起潛僅以身逸大學士劉宇亮次定州  
報至仆地遂入保定孫傳庭營象昇既死部將張國棟趨報楊嗣  
昌嗣昌欲增飾象昇退怯之狀以聞國棟不可嗣昌怒撻掠備至  
終不承但曰死則死耳忠臣而以為逗留力戰而以為退怯不可  
誣也總理內監高起潛妬之謂象昇實不死嗣昌遣帳下卒三人  
往驗報死狀嗣昌鞭之亦不服其一人斃杖下順德知府于顯從  
定州城外得其遺骸雜中刀矢血漬麻衣上設祭哭歛軍民莫不  
雨泣事始白建州兵分隔昌平寶坻平谷清河良鄉玉田薊霸景  
趙玉田知縣楊初芳降諸生桑開基死之

楊初芳之降已見三年重出後再考

十二年春正月庚申建州兵下濟南先是山東總兵倪寵入援抵



大興傅氏長恩閣鈔本

德州而返巡撫顏繼祖奉命移德州建州兵越德州渡河歷臨清  
分道一趨高唐一趨濟甯合於濟南梯城而上吏卒駭遁巡按御  
史宋學朱方肩輿出院聞西城已墮役隸駭散遂遇害布政使張  
秉文副使鄧謙濟周之訓運使唐世熊知府苟好善等皆死之德  
王被執諸郡王並見殺濟南焚燬一空已德王遣內官王朝進等  
自廣甯入上書御史汪承詔言宜火其書勿令傳外王朝進等編  
置遠方如皇上篤展親之誼更遣人量費用物俾申德意若曰王  
失守社稷達播沙漠庶幾上天悔禍隆禮有加宜優游塞外以終  
天年朕已撫王嗣子俾續舊服俟其成立當使自將待還以泄王  
憤如此庶彼知朝廷大義可杜其凌侮從之王遂不返副總兵祖  
寬以三百騎馳援濟南力戰死寬塞外人為祖大奇養子驍勇敢

戰至是敗沒大學士劉宇亮總督孫傳庭會兵十八萬自晉州援  
濟南祖大壽亦自青州至命御史郭景昌巡按山東景昌至悉發  
倉粟賑貧民痊濟南城內外積屍十三萬建州兵自濟南取東平  
下華縣復至濟甯臨清固城分兵克營丘館陶尋取慶雲東光海  
豐遂東行入冠縣畧陽穀壽張至張秋東平入汶上焚康莊驛攻  
兗州距徐州百餘里居人南渡安慶巡撫史可法駐徐州督察大  
學士劉宇亮督總督孫傳庭等會師於大城大學士楊嗣昌請移  
登萊總兵于臨清護南北倉練郡縣鄉兵改府佐為將領州佐為  
守備縣佐為把總否則裁儒學訓導一員補武秩文武相兼古制  
也上是之建州兵攻滄州青縣趨天津二月山東巡撫顏繼祖  
邀逮免逮山東總兵倪罷降內監高起潛三級總督孫傳庭一級

大興傅氏長恩閣鈔本

舒察大學士劉宇亮戴罪尋削籍時建州兵退官兵屯滄州鹽山  
宇亮奏劾諸將尾敵不戰因及總兵劉光祚而楊嗣昌謀逐宇亮  
故請誅光祚適有武清之捷宇亮下光祚武清獄以請且告捷上  
切責之削籍諸道兵逐戰報斬三千餘級總兵祖大壽張進忠伏  
兵寶坻之楊家莊邀斬千餘級大抵逃回難民也建州兵捆而東  
避實走虛西至青山口總兵陳國威于喜峰口擊卻之未出塞  
三月建州兵趨豐潤副總兵虎大威楊德政禦卻之京營各鎮兵  
戰於太平寨北報捷建州兵至冷口以有備去之復出青山口踰  
日盪出塞建州兵入口凡五月轉掠二千里下州縣七十餘城雖  
羽書屢捷實未嘗少挫也逮失事諸臣以五案定獄奪大學士  
楊嗣昌秩仍令視事巡按御史郭景昌上言濟南藩封之變誰司

中樞而被禍至此使當時倪寵勤王至德州即令就近守濟甯顏繼祖遂返濟南未墟也今繼祖寵既逮當死而嗣昌罪出其上仍混尋朝班議人之功罪則功罪愈為不明何以懲前警後乎上以其黨同伐異逮下獄景昌復從獄中上言忠佞分途止論臣言之當否何論臣跡之異同上切責之戊戌代州已而叙邵敵功復楊嗣昌大學士薛國觀等各賜金幣蔭子入監內監曹化淳盧九德等蔭錦衣衛指揮有差 六月上出復河套議凡言不可復者皆入選或曰楊嗣昌密議棄遼東故例以河套也 八月誅文武失事諸臣巡撫張其平顏繼祖總兵倪寵陳國威內監鄧希詔孫茂霖等三十二人陳祖苞先飲藥死

十五年十一月建州兵大舉分入墙子嶺先是建州兵圍錦州踰

年洪承疇祖大壽等力禦之故不及關入塞承疇等既敗遂舉兵  
大入破遼安三河分道一趨通州一自柳樹澗趨天津甲戌屯永  
平之臺頭乙亥攻通州京師戒嚴勲臣分守九門戊寅建騎克薊  
州分往真定河間香河閏十一月壬寅建州兵入河間明日分  
向臨清甲辰克霸州兵備僉事趙輝輝同知丁師義前常鎮道李  
時英俱死之尋入文安丙午自清苑趨長蘆戊申入臨清又入阜  
城殺知縣呂大成壬子入景州甲寅克河間叅議趙珽知府顏胤  
紹知縣陳三接死之戊午攻東昌總兵劉澤清禦之遂西攻冠縣  
辛酉建州兵自臨清分五道孔有德巢丕昌祖洪基等分掠莘縣  
館陶高唐諸郡縣壬戌攻海豐癸亥攻張秋其西路至大名不攻  
甲戌建州兵入汴陽連克沂州豐縣殺知縣劉光先蒙陰泗水鄒

縣皆下 十二月丁卯建州兵自長垣趨曹濮別騎抵青州入臨淄知縣文昌時闔室自焚死連破陽信濱州殺陽信知縣張子鄉攻濟甯守者拒卻之癸酉建騎入兗州執魯王壽鏞王自經兵備王維新知府鄧藩錫副總兵丁文明滋陽兵科都給事中范淑泰等死之遂分兵上泰安青州魚臺武城金鄉單縣俱下癸未圍海州進破滕縣剋城嶧縣剋城

十六年春正月建州兵攻開州自滑縣趨東昌 二月丁卯畧壽光明日攻德州入武定又攻樂陵入萊陽殺故工部右侍郎宋政吏部郎中宋應亨中書舍人趙士驥知縣張宏德等萊陽知縣陳顯際自經先是建州兵攻萊陽攻等合禦卻之已而置酒高會或內應引敵一夕陷壬午攻安丘山東總兵劉澤清禦卻之壬辰建

州兵出登萊合軍 三月乙未克順德殺知府吉孔嘉乙巳克南宮庚戌取道彰德順德北向命嚴真定保定守備癸亥建州兵至易州之楊村 夏四月甲子建州兵北折道畿內經寶坻丙子至琉璃河命各督撫扼勦毋逸辛巳戰於螺山八鎮皆逃惟步營兩監軍御史在御史蔣拱宸飾功報捷大學士周延儒自請督師出戰癸未賜宴武英殿明日出都門丙戌周延儒奏捷報斬百餘級時邊城既隲子女玉帛捆載出入如織卒無一矢加遺也 五月庚子馳賜周延儒金幣延儒奏稱臣中夜冒警自順義抵密雲趨各督撫逐戰東騎今俱出塞上溫旨勞之

十七年春三月李自成陷京師遼東總兵平西伯吳三桂以建州兵入關自成戰敗遁

明史紀事本末補遺卷六終

大興傅氏長恩閣鈔本



大興傅氏長恩閣鈔本

海昌吳壽暘拜經樓藏書題跋記云舊鈔本紀事本末備遺  
二冊不分卷亦無序目撰人名截去首冊為遼左兵端熊王  
功罪插漢寇邊二冊為毛帥東江錦甯戰守東兵入口凡六  
篇按是書體例全仿谷應泰明史紀事本末祇篇末無論為  
小異耳觀卷中附注有詳流寇之亂崇禎治亂等語此兩篇  
乃谷書中子目疑此書亦出其手初為一書後以事關 昭  
代龍興恐有嫌諱授梓時始別而出之如鄒漪刻綏寇紀略  
特闕虞淵沈中下兩篇未可知也故二百年來寫本廬存流  
傳甚夥吳氏而外儲藏家罕見著錄惟近人東江遺事嘗引  
及之拜經樓舊鈔今歸陸存齋觀察此本即從吳本傳錄以  
所載皆補谷書之遺依谷書一篇一卷之例改題明史紀事

本末補遺定為六卷

光緒三年歲次丁丑孟冬下浣大興傅以禮節子氏識